

h. 114. 26.

Za
5265

10

Gründlicher Bericht/

Von .

X 204 78 74

Christlicher Lauf

se JOHANNIS CHRISTIA-

NI, eines gebornen Jüden von Franck-

surt am Mann/ vor seiner Widergeburt ELIAS

genant/ geschehen zu Coburg in der Pfarrkirchen/ am

PalmSontage/ den 5. April. An.

no 1612.

Der Wahrheit zu Steur/ vnd auff begeren from-

mer Christen/ auß vielen erheblichen Ursachen/ gestellet/

vnd zum Druet verordnet/ durch das

Ministerium zu Coburg

Sampe einer

Lauff PREDigt

Von den Jüdischē Fabeln/ vnd beständiger gründ-

licher Wahrheit Christlicher Religion

Melchioris Bischoffs/ Super-


intendentis daselbstem.

Psalm. 68 v. 23.

Auß der Tiefe des Meers wil ich etliche holen.

Anno M. DC. XIV.





AD CHRISTIANÆ
FIDEI CANDI-
datum.

Iam de corde tuo velum, Judae, remotum est,
Jam faciem Mosis cernere posse datum:
Conversus, Christum, Causam, preciumq, salutis
Mundi, dum vivâ, conspicias esse, fide.
Sincerè pergas tam clara luce fruisi,
Æterna Lux hæc lucis origo tibi.
At veram Lucem Christum qui temnit, is olim
In tenebras atra ejiciendus erit.

M. NOAH OTTO
Pastor & Sup. Römh.



211

Za 5265 Q4



An den Christli- chen Leser.

Christlicher lieber Leser/von
 der Christlichen Tauffe Johannis
 Christiani/eines gebornen Juden
 von Franckfurt am Mayn/wel-
 cher vorhin Elias genent/ geschehen zu Go-
 burg am Sontage Palmarum/ dieses in ste-
 henden Jars/ ist ein blinder Bericht in Druck
 außgesprengt/ ohne benennung des Autoris/
 des Druckers/ vnd des Orts/ dannen her sol-
 cher Druck außgeflogen. Ob wir vns nun
 wol gar leicht können bereden lassen/ daß es
 nicht böse gemeint sey/ wir könnten auch die
 Schrift/ ohn alles einreden vnd widerspre-
 chen/ fur sich also dahin schleichen vnd strei-
 chen lassen/ wenn sie nur allenthalben auffm
 Grund daher gienge: Jedoch aber/ weil wir
 befinden/ daß sich der Bericht/ in vielen vor-

) (ij nemen



An den Christlichen Leser.

nemen Stücken vnd Umständen der Historien/ gröblich geirrt/ vnd neben der Wahrheit hin gegriffen/ dadurch viel frommer vnd verständiger Christen/ die dem A&ui selbst beygewohnt/ vnd alles/ was da surgangen/ wol in die Augen gefasset/ zu Ohren vnd Herzen genommen/ höchlich offendirt, andere aber/ so nicht darbey gewesen/ vnd doch den rechten Grund gerne wissen vnd haben wolten/ auch nach der beschehenen Tauff Predigt sich mit Verlangen umbsehen: ist es nicht alleine für nütz vnd gut/ sondern auch für eine Nothdurfft erachtet worden/ in beyden Stücken Christliebenden/ vnd der Wahrheit begierigen Herzen zu willfahren.

Wir zwar/ vor vns/ sind nicht bedacht gewesen/ ohne sonderlichen Befehl/ hiervon etwas zu publicirn, inmassen wir auch nichts in so hohem Werck/ ohne Befehl/ surgenommen vnd gehandelt: Dieweil aber die Wahrheit Nothleidet/ vnd es nicht verantwortlich seyen wil/ mit so hohen wichtigen Sachen in der Gemeine Gottes/ nur umb newer Zeitung willen/ wie die zu Athen: Actor. 17. zu spielen/ darzu den auch dz begeren vnd bitten frommer Chris-

ten/

An den Christlichen Leser.

sten/ hie vnd anderswo/ kömpt/ haben wir sol-
 chen Zustand/ an statt eines ernstern Befehls/
 dahin vns bewegen lassen/ daß wir mit der ge-
 haltenen Tauffpredigt vnd ganzem Proceß
 ans Liecht kommen. Sind der tröstlichen
 Hoffnung/ es werde beydes seinen Nutz bey
 andechtigen frommen Christen/ zum wenigste
 bey denen/ die sich darnach gesehnet/ durch
 Krafft vnd Wirkung des h. Geistes/ schaf-
 fen. Vnd ob es gar ohne Nutz abgehen solt/
 welches nicht wol möglich/ weil es wieder die
 Natur Göttliches Worts/ vñ wieder die schö-
 ne Verheißung Gottes/ Esaiæ 55. Mein
 Wort sol nicht wie leer zu mir kömen:
 Wollen wir doch jederman für Schaden gut
 seyen/ vnd den lieben frommen Gott im Him-
 mel des zum Bürgen darsetzen. Demselben
 danken wir von Herzen/ für sein h. Wort vnd
 Sacrament/ dadurch Er ihm für vnd für eine
 Kirch auff Erden/ auß Jüden vnd Heiden/
 samlet/ vnd gibt immerdar frische/ fröliche/ ne-
 we Zeitung von Christo in die geengsten vnd
 zerschlagene Herzen/ damit sie auff Gottes
 Gnad/ wider Sünde/ Tod/ Teuffel vnd Hell/

An den Christlichen Leser.

bis ans Ende getröstet/vñ durch waren Glauben an Christum zur ewigen Seligkeit erhalten werden. Wir bitten ihn auch/ für vns/ für unsere lieben Pfarrkinder vnd Zuhörer/ vñ für die ganze Christenheit/ Er wolle in kurzen/ nicht allein den Satan gar vnter vnser Füße treten: Rom. 16. sondern auch demaleins/ durch seine 5. Engel/ vnd ihre hellklingende starcke Posaunen: 1. Thes. 4. die fröliche neue Zeitung vom Himmel herab intonirn vnd erschallen lassen/ dz der wunderbarliche Bau eines neuen Himmels/vñ einer neuen Erden/ da nichts denn Gerechtigkeit inn wonen sol: Esa. 65. 2. Pet. 3. Apoc. 21. fertig sey/ vnd wir dieselbige zur ewigen Besizung/ mit allen Außerwelten/einnemen vnd beherrschen sollen/ Amen: Vnd alles/was Christliches Namens vnd Herbens ist/das spreche: Ja/ köm lieber Herr Jesu. Die Gnade vnser Herr Jesu Christi sey mit vns alle: Amen: Apocal. 22. Geschrieben am Abend Johannis Baptistae:

Anno 1612.

Ministerium zu Coburg.

DEDI



DEDICATIO.

Denen

Ehrenvesten/ **M**acht-
barn/ Hoch- vnd Wolgelarten/ Er-
barn vnd namhaftten Herrn Johanni Scha-
den/ der Rechten Doctori, vnd J. S. Cansley- vñ Hoff-
Rath: Herrn W. Caspar Schwertel/ regierenden Bür-
germeister: Vnd Herrn Daniel Langer/ vornehmen
Bürger vnd Handler in Coburg:

Desgleichen

Denen Erbarn vnd Ehrentugentsamen Fra-
wen vnd Jungfrauen/ Frauen Lucretia Schellhassin/
Doctorm / Jungfraw Sabina Steinackerin/ vnd
Frauen Maria Bischhoffin/ Super-
intendencin.

Allen/

Zudem Christlichen Werck der Gevatterschafft/ bey der
Lauffe IOHANNIS CHRISTIANI, er-
fordere/ vnd erschienen/ meinen günstigen Herren vnd
Gevattern/ Freunden/ Freundinnen/ vnd lieben Weis-
be.

GVN



400.
Vorrede.

Vnstige liebe Herren/ Fra-
wen/ Jungfraw/ Bevattern/ vnd
gute Freunde/ Ungezweiffelt ist
IOHANNIS CHRISTIANI.
vnsers lieben Tauffvoden/ Bekehrung vom
Judenthum zum Christlichen Glauben ein
allmächtig vnd sonderlich Gnadenwerck des
ewigen Sons Gottes/ vnsers lieben Herren
vnd Heilandes/ Jesu Christi/ welcher zwar/
im acht- vnd sechzigsten Psalm/ der Jüdischen
Synagog/ vmb jres verstockten Unglaubens
vnd Vndancks willen/ einen Abschied vnd zornige
Verstossung drewet/ aber doch darneben
sich hören lest: Auß der Tieffe des Me-
ers wil ich etliche holen. Tieff/ tieff ist
vnsere Johann Christian in dem Abgrund des
weiten vnd bodenlosen Meers/ Jüdischer Sa-
bels/ Irthumb/ Lügen/ Lasterung/ gesteckt/
vnd solcher massen darinn ersoffen gewesen/
das niemand dencken können/ ihm darauß sol-
te geholffen/ vnd er auß einem Juden/ ein Chris-
ten werden. Aber/ was ist Gott unmög-
lich? Vnd wer kan seiner Barmherzigkeit Ziel

vnd

Vorrede.

vnd Maß setzen? Als nun vnserm Johann Christian das helle Liecht Christlicher Lehr vnd Warheit / durch des h. Geistes Gnad vnd Wirkung / mechtiglich vnter die Augen geleuchtet / vnd er sich mercken lassen / daß sich sein Hertz von dem Judenthum abwende / vnd nach dem Christenthum sehne / hat er sich mit aller Jüden Feindschafft in Franckfurt der massen beladen / daß sie ihn / wie wol / sub alio prætectu, vnter einem andern Schein / vnd mit Fürwendung anderer Ursachen / zur Haft bracht / vnd von dannen nicht lassen wollen / er trete denn wider zu ihnen / vnd werde widerumb ein Feind vnd Lesterer Christi / welches / als es ihm in seinem Gewissen zu schwer fürfiel / vnd er nicht dran wolt: Denn er hatte schon die Süßigkeit des HERRN erschmackt: haben sie ihn zu lezt dahin gedrungen / wolt er seiner Haft vnd Gefengnuß entledigt werden / daß er Weib vnd Kind begeben / vnd nach bösem Jüdischen Brauch / per libellum repudii, durch einen Scheidbrieff / sie frey machen / vnd von sich lassen solt / welches geschehen. Da er nun solcher Gestalt loß worden / hat er sich

)(

bald

Vorrede.

bald mit Verlangen umbgesehen nach einem Ort/ da er die h. Tauffe empfangen/ vnd der Gemeine Jesu Christi öffentlich incorporirt vnd einverleibt werden möchte. Ist endlich/ mit Rath vnd Beförderung guter Leute/ zu uns anher gen Coburg kommen/ bey vnser Landsfürstlichen gnädigen hohen Obrigkeit/ vnd derselbigen Consistorio, sich angeben/ bemühet/ vnd so vielerhalten/ daß uns im Ministerio auffgetragen worden/ ihn zu verhören/ zu examinirn/ vnd mit Fleiß zu forschen/ ob ihm auch sein vornemen ein rechter Ernst sey/ vnd ob er gedencke bey Christlichem Glauben fest vnd bestendig/ bis an sein Ende/ ungeachtet aller Widerwertigkeit vnd Verfolgung/ so ihm darüber begegnen möchte: Denn Evangelium ist nicht/ vnd nichts/ ohne Creuß: zu verharren. Dieweil wir denn ihn auff einer rechten Christlichen guten Meinung/ vnd in einem beständigen ernstē Vorsatz/ bey Christo/ vnd seinem h. Evangelio/ in Lieb vnd Leid/ durch Creuß/ Noth vnd Tod/ außzudauren/ befunden: Ist drauff der Actus solennis, in vnser Pfarzkirchen erfolgt/ vnd bey demselbigen

eine

Vorrede.

eine Christliche Predigt / zur Warnung für
Jüdische vnd allen andern klugen Fabeln / die
dem Wort Gottes zu wider / gehalten / wie jr
euch des alles Christlich vnd freundlich habt
zuerinnern.

Solche Predigt hab ich / bey für-
genommener Publication des ganzen A. & S.
darzu vns erhebliche / vnd ganz Christliche
Ursachen bewogen / euch insonderheit / vnd mit
Nahmen / dedicirn vnd zuschreiben wollen:
Erstlich / als meinen lieben Christlichen Mitt-
gevätern / bey der heiligen Tauffe vnser's Do-
dens. Zum andern / meine Danckbarkeit
gegen euch samptlich vnd sonderlich zu erwei-
sen / eben für das Christliche Werk / daß ihr
euch auff bescheynes bitten vnd erfordern / ohn
alle Beschwerung / ganz gut vnd Christwil-
lig / zur ißtgemelten Geväters oder Doden-
schafft habt bestellen vnd vermügen lassen. Ich
zwar / ohn allen vngedüßhrenden Ruhm / zu
melden / hab mein liebes Weib gern vnd mit
Frewden darzu geschickt / achte mirs auch noch

) () (ij

für

Vorrede.

für eine große Glückseligkeit vnd Ehre/ daß ich in meinem hohen Alter/ vnd so kurz vor meinem Abschied auß diesem Leben/ einen Menschen Jüdisches Geblüts/ auß seinem verfluchten Judenthum zu der allerseeligsten Christenheit/ mit Lehr vnd Unterricht/ mit Gebet vnd Zeugnuß/ habe helfen sollen. Denn es kömpt doch das Heil von den Jüden: Johan. 4. vnd Iesus Christus/ durch welchen wir hoffen selig zu werden/ ist ein geborner Jude/ Davids Sohn/ Abrahams Samen/ wie die heilige Schrift allenthalben bezeuget: Matth. 1. Rom. 1. Gal. 3. 26. Solts denn nicht wol gethan seyen/ einem verirrenen Jüdischen Menschen auß seinem Irrthum helfen/ vñ im zur Seligkeit/ durch ordentliche Mittel/ dienen/ Iesu von Nazareth/ dem Könige der Jüden/ zu Ehren vnd Wolgefallen? Bedenck auch/ schreibt S. Paulus/ Rom. 11. daß du die Wurzel nicht tregst/ sondern die Wurzel tregt dich. Sind aber die Zweige zerbrochen/ vmb jres

Inglauz

Vorrede.

Unglaubens willen / Gott kan sie
 wol wider einpflropffen / wenn sie im
 Unglauben nicht bleiben: Wie / Gott
 Lob / diesem unsern Iohanni Christiano, mit
 grossen Gnaden widerfahren. Fürs dritte /
 ich kans leicht außrechnen / vñ laß michs auch
 ohn alle Müh gar leicht vberreden / daß diese
 meine Predigt / so wol auch der ganze Proceß /
 schwerlich werde vberupfft vñ vñ ungetadelt
 bleiben / nicht allein von frembden / sondern
 auch wol von den unsern / welche vns billich
 schützen / vñ von so hohen Sachen daß beste
 reden solten / denn Welt bleibt doch Welt /
 wer sie nicht kent / mag sie kenffen. Ich wolt
 nicht ein Burschenlein vmb sie geben. Wir
 lassen vns gnügen in dem Zeugnuß vnsers gu-
 ten Bewissens / vñ daß wir in Einfalt / nach
 dem Vermügen / welches Gott / auff vorgehen-
 des herglichen Gebet / verliehen / gethan vñ
 angeordnet / was wir zu Gottes Ehren / vñ
 Erbauung der Kirchen / für nützlich erachten
 können. Haben vns auch nicht geschemt / an-
 dern vornemen Lerern / denen gleiche Actus zu

Vorrede.

verrichten vorkommen / so viel sichs leiden vnd
 schicken wollen / zu folgen. Getrösten vns
 demnach zu vnserm lieben H Erren Jesu Chris-
 sto alles gnädigen Schutzes im Himmel / für
 allen heiligen Engeln. Nichts desto weniger /
 weil es auch sanffte thut / hie auff Erden bey
 frommen vnd verständigen Christen gut Zeug-
 nuß vnd nothwendigen / gebührliehen Schutz
 wider die Calumnianten haben / als beruffen wir
 vns hiermit / nicht allein auff alle vnserer Christ-
 liche vnd treuherzige Zuhörer / in gemein / son-
 dern wir enghen auch euch sechs zur Bevatter-
 schafft beruffnen Personen / in sonderheit /
 sampt denen / so euch angewand / Predigt vnd
 Proceß zu / mit Bitte / dieselbige in ewer Patro-
 cinium auffzunemen / vnd hiermit / auch an-
 dern Leuten zu gut / daß Gute befördern zu
 helffen. Fragen zu euch die gängliche Zuber-
 sicht / ihr werdet euch vnserer Dedication vnd
 bitte nicht zu wider seyn / sondern in allen
 Christlichen Gunsten gefallen lassen / gleich
 wie sie auch euch / zu nichts anders / denn zu al-
 len Christlichen Ehren vñ gutem / bey Gott im
 Himmel / vnd bey frommen Christenmenschen
 auff

Vorrede.

auff Erden / gereichen mag. Uns alle hier
mit Gott vnd dem Wort seiner Gnaden be-
fohlen / der helff vns dort in regno gloria mit
Freuden zusammen / wie er vns allhie in regno
gratia zusammen beruffen / durch seinen Geist
geheiliget / vnd zu Erben des ewigen Lebens /
in Christo Jesu außerwelet hat: Amen / Amen.

Datum Coburg am 25. Iunii, an welchen / vor
82. Jahren / die Augspurgische Confession mit
grosser Solennitet Röm. Keyserl. May. Carolo
V. vbergeben / vnd von Gott bisher wunder-
barlich erhalten vnd geschüzt worden. Fiat

idem usq; ad mundi finem, frementib. li.
cet portis inferni. A M E N.

Anno 1612.

Melchior Bishoff.
Superint.



Lauff

418.



Tauffpredigt vber einen Juden.

1.



Tauffpredigt /
Von Jüdischen Fabeln / vnd besten-
diger / gründlicher Warheit Christ-
licher Religion.

In
Nomine Iesu:
Amen.

JOHANNES CHRIS-
TIANVS, in seiner Widergeburt
also genennet / zuvor ELIAS geheis-
sen / ein geborner Jude von Franck-
furt am Mayn / ist zu Coburg getaufft wor-
den / in der Pfarrkirchen zu S. Moritz ge-
nant / am PalmSontage / im Jarenach Chri-
sti geburt / 1612. Vor der Tauffe ist nachfol-
gende Predigt gehalten worden.

A

Ein



Eingang zur Predigt.

Aberwelte/ vnd geliebte im H^{er}ren/ auß heutiger Andeutung/ nach gehaltenener Amptspredigt geschehen/ hat ewer E. L. vernommen/ daß in dieser Stunden angestelt sey die Christliche Tauff eines Jüdischen Menschen/ welches zu Franckfurt am Mayn von Jüdischen Eltern geboren/ nach dem Fleisch vnser lieben H^{er}ren vnd Heilands Jesu Christi/ Blutsverwandter ist: Denn Christus/ vnser lieber H^{er}r/ ist auch ein geborner Jüd auß Abrahams Samen/ ein Sohn vnd Stuel Erbe/ König Davids/ ein König der Jüden/ das ist/ aller/ die an ihn gläuben/ vnd seinen Namen bekennen/ sie sind gleich vom Geblüt Jüden oder Heyden. Dieses Blutsfreund/ sag ich nun/ ist vnser E^lIAS/ nach dem Fleisch: Aber nach dem Geist/ oder/ wie S. Paulus redet/ nach dem Evangelio, ist er bisher gewesen ein Feind vnd Lesterey Christi/ vnd aller/ die Christum angehören. Denn anders ist er von seinen Jüdischen Eltern/ von den Rabinen/ Doctorn/ Lerern/ Verwandten vnd Bekanten/ nicht vnterrichtet/ gelehrt/ gefähret/ erzogen vnd gewehnet. Nunmehr aber/ nach dem er Barmhertzigkeit von Gott erlangt/ vnd ihm die seligmachende Erkenntnuß I^hESU Christi/ als des waren Messix/ vnd einigen Heilandes aller Welt/ durch die Lehre des heiligen Evangelii, ins Herz geschienen/ vnd dasselbige erleuchtet/ hat er eine gute geraume Zeit hero nichts anders gewünscht vnd begehrt/ denn/ daß er durch das Sacrament der h. Tauffe Christo

vnd

Taufspredigt vber einen Jüden.

3.

vnd seiner Kirchen einverleibt würde. Vnd daß solches allhie dieses Orts/ in vnser Stadt vnd Gemelne/ geschehen möchte/ darumb hat er vnterthänig vnd demüthig bey vnserm gnädigen Fürsten vnd Herrn/ bey dem S. Consistorio, vnd bey dem Ministerio dieser Stadt supplicirt vnd angesucht/ welche alle/ weil sie in Gnaden/ vnd mit Christlichen Consens, ihnen solches gefallen lassen/ vnd hierüber Befehl von sich geben/ wollen wir nun/ im Namen Gottes/ zu dem heiligen Werke schreiten/ vnd dasselbige/ durch seine Hülffe verrichten.

Dieweil es aber notwendig/ nicht allein vmb vnser Candidati willen/ der da getaufft werden sol/ sondern auch vmb der andern vnser Zuhörer willen/ daß eine Christliche Erinnerung auß Gottes Wort vorher gehe/ so erhebt nun/ lieben Freund in Christo/ ewere Herzen zu Gott/ vnd seufftete mit mir vmb gnädige Erleuchtung vnd Regierung des h. Geistes/ ohn welchen doch weder Meister noch Schüler/ weder Lerer noch Zuhörer/ etwas vermag/ daß die angestellte Predigt dem allerheiligsten Namen Gottes zu Ehren/ vnd vns allen/ sämtlich vnd sonderlich/ zu Heil vnd Trost gedene. Betet hierauff mit mir/ im Namen Jesu Christi/ mit gläubigen Herzen: Vater vnser der du bist im Himmel/ &c.



A ij

Text/



Text

Auß der andern Epistel S. Petri
am ersten Capitel. *v 16—17*

WIr haben nicht den klugen Sa-
beln gefolgt/ da wir euch kund
gethan haben/ die Krafft vnd Zu-
kunfft vnser^s HERRN Jesu Christi:
Sondern wir haben seine Herzigkeit
selber gesehen/ da Er entpfing von
Gott dem Vater Ehre vnd Preis/
durch eine Stimme/ die zu ihm ge-
schach von der grossen Herzigkeit/ der-
massen: Disz ist mein lieber Sohn
an dem ich Wolgefallen habe. Vnd
diese Stimme haben wir gehört vom
Him-

Tauffpredigt vber einen Jüden.

5.

Himmel bracht/ da wir mit ihm wa-
ren auff dem heiligen Berge.

Wir haben ein fest/ vnd Prophe-
tisch Wort/ vnd ihr thut wol/ daß ihr
drauff achtet/ als auff ein Liecht/ das
da scheint in einem tuncckeln Ort/ bis
der Tag anbreche/ vnd der Morgen-
stern auffgehe in ewern Herzen.

Erklärung.

Wir wollen auff dißmal nicht
für vns nemen außfürliche vnd vol-
lige Erklärung dieses abgelesenen Texts/ dar-
zu viel Zeit gehören würde/ sondern was vns
zu isigem Werck vnd Vorhaben dienlich/ wollen wir al-
termest darauß zusammen ziehen/ vnd davon/ in Christo-
licher Einfalt/ kürzlich handeln.

S Petrus redt allhie dem Evangelio, oder/ der Les-
re von vnserm lieben Herrn Jesu Christo/ das
+ Wort/ tam negativè quā affirmativè, durch
Nein vnd Ja/sagt/ daß es nicht ein klug Menschengetich-
te sey/ sondern es sey eitel Göttliche Wahrheit/ welcher Gott

A iii

selbs



Taufspredigt vber einen Jüden.

selbs vom Himmel herab öffentlich Zeugnuß gegeben/ da Er sich vber Christo hören lassen: Disz ist mein lieber Sohn/ an dem ich ein Wolgefallen habe. Sprichstu/ wer ist darbey gewesen? Wer hat das Zeugnuß von Jesu/ von Nazareth/ auß Gottes Munde gehört/ daß er sein lieber Sohn sey/ an dem er ein Wolgefallen habe? Darauff antwortet S. Petrus: Wir habens gehört. Wer denn? Ich/ vnd neben mir/ Iacobus vnd Johannes/ die zween Söhne Zebedæi. Woher ist die Stimme komen/ vnd an welchem Ort ist sie gehört worden? Wir haben diese Stimme gehört vom Himmel bracht/ da wir mit ihm auff dem heiligen Berge waren.

Darnach referirt sich der Apostel auff die Zeugnuß der Propheten im alten Testament/ welche/ was sie jemals von Christi Zukunfft geweissaget haben/ das ist nicht auß menschlichen Willen hersür bracht/ sie habens nicht für sich selbs erdichtet/ oder auß ihren Lspffen gesponnen/ viel weniger von andern Leuten gehört/ vnd in sich gesogen/ sondern/ die heiligen Menschen Gottes haben geredt/ getrieben von dem h. Geist: Wie S. Petri Wort im folgenden Text lauten. Was aber die heiligen Propheten/ auß des h. Geistes offenbahren vnd antreiben/ vom Messia im alten Testament geweissaget/ vnd zuvor verkündigt haben/ das ist alles im neuen Testament/ an der Person Jesu Christi/ erfüllet/ wie solches die Aposteln/ als vorerwelte Zeugen Gottes/ die alles mit Augen gesehen/ vnd mit ihren Ohren gegenwertig gehört/ bestän-

diglich

Taufspredigt vber einen Jüden.

7.

diglich außsagen/ vnd S. Petrus/ insonderheit/ im Hau-
 se Corneli, gegen vielen Zuhörern/ also spricht: Wir
 sind Zeugen alles des/ das Jesus von Naza-
 reth gethan hat/ im Jüdischen Lande/ vnd zu
 Jerusalem. Den haben sie getödtet/ vnd an
 ein Holtz gehangen: Denselbigen hat Gott
 aufferwecket am dritten Tage/ vnd ihn lassen
 offenbahr werden/ nicht allem Volck/ sondern
 vns/ den vorerwelten Zeugen von Gott/ die
 wir mit im gessen vnd getruncken haben/ nach
 dem er aufferstande ist von den Todten. Vnd
 er hat vns geboten / zu predigen dem Volck/
 vnd zu zeugen/ daß er ist verordnet von Gott
 ein Richter der Lebendigen vnd der Todten.
 Von diesem zeugen alle Propheten/ daß durch
 seinen Namen/ alle/ die an ihn gläuben/ Ver-
 gebung der Sünden entpfahen sollē: Act. 10.

Auß dieser summarischen Erzählung vernemen wir/
 wie ein groß weit Feld zu den aller fürnehmsten vnd höch-
 sten sachen/ bey diesem Text/ sich vns auffihue. Aber vns-
 sers Fürhabens eingedenck/ vnd vmb Kürze willen/ daß es
 nicht zu lang werde/ wollen wir vnser Predigt zusammen-
 zihen in den einigen Locum, vom Unterscheid mensch-
 licher Fabeln/ vnd Göttlicher Wahrheit/ im Wort geof-
 fenbare. Hört derwegen an: Zumersten/ von Mensch-
 lichen/ bevoorauß Jüdischen Fabeln/ in Religions Sa-
 chen. Darnach/ von Autoritet vnd Ansehen/ von Ges-
 wisheit

da
 ies
 he.
 ug
 rt/
 has
 ns
 nd
 die
 or
 is
 en
 us
 als
 us
 ur
 piel
 en/
 en
 Pe.
 heis
 ans
 nd
 nt/
 po
 zen
 an
 lich



Taufspredigt vber einen Jüden.

wisheit vnd Krafft/ der Lere des h. Evangelii, welche in vnsern Kirchen geführt vnd bekant wird. Darzu gebe der Allmächtige Gott seinen Geist vnd Segen durch Jesum Christum/ Amen.

I.

Von den Jüdischen Fabeln.

Wir haben nicht den klugen Fabeln gefolgt/
da wir euch kund gethan haben/ die Krafft
vnd Zukunfft vnseres HErrn Jesu Christi.

Jesus Christus/ vnser HErr/ da er kurz
vor seinem Leiden vnd Sterben/ als der rechte vnd
ewige Hohepriester/ nach der Weise Melchisedech/
für seine Jünger/ vnd für die ganze Christliche Kirche bis
an der Welt Ende/ herrlich betet/ braucht er vnter andern
schöne Wortē/ auch diese: Vater/ heilige die/ so du
mir gegeben hast/ in deiner Wahrheit: Dein
Wort ist die Wahrheit: Johan 17. Hierauf er-
scheinet klarlich/ daß alles/ was in Religions Sachen/
auffer vnd wieder Gottes Wort ist/ es sey ertichtet vnd
herfür bracht von wem es immermehr wolle/ auch von den
allerklügsten vnd gelertesten/ auff Erden/ daß solches nicht
Wahrheit sey/ sondern eitel Lügen vnd Irthumb/ wie sich
solches auch augenscheinlich vnd greifflich befindet/ ex
collatione, wenn man die alten Heidnischen Grewel/ den
Türkischen Alcoran, des Papsts Decret, der Mönche
Träume/ vnd der Jüden thalmudisch Fabelwerk/ gegen

Gottes

Tauffpredigt vber einen Jüden.

9.

Gottes Wort helt/ vnd sie mit Ernst examiniret. Aber so weit wollen wir auff ditzmal nicht gehen/ sondern allein von den Jüdischen Fabeln etwas erinnern.

Denn das der h. Apostel Petrus fürnemlich dahin gesehen/ wenn er spricht: Wir haben nicht den klugen Fabeln gefolget: das gibt vns S. Paulus in etlichen Orten seiner Epistel zu erkennen. Als/ in der ersten Epistel an seinen lieben Jünger Timotheum, am ersten Capitel/befihlt er ihm/das er etlichen Lehrern in der Stadt Epheso mit Ernst gebieten sol/ anders nicht zu leren/ denn wie/ vnd was sie von S. Paulo gelernt: / vnd das sie nicht acht haben auff die Fabeln/ vnd der geschlecht Register/ die kein Ende haben/ vnd bringen Fragen auff/ mehr denn Besserung zu Gott im Glauben. Desgleichen schreibt er auch am vierden Capitel/ dieser Epistel: Der vngestlichen vnd altvettlichen Fabeln enschlahe dich. Vbe dich aber selbst in der Gottseligkeit. Denn die ist zu allen Dingen nüz/ vnd hat Verheissung dieses/ vnd des zukünfftigen Lebens. Titum, den Kirchen Bischoff/in der Insel Creta, vermanet er auch also/ vnd spriche: Straffe sie scharff/ das sie gesund seyen im Glauben/ vnd nicht achten auff die Jüdischen Fabeln/ vnd menschen Gebot/ welche sich von der Warhet abwenden: Tit. 1.

Wenn wir diese Sprüche S. Pauli zusammen fassen/ vnd fleissig ansehen/ geben sie vns Erinnerung von

D

dreyen



Taufspredigt vber einen Jüden.

dreyen wichtigen Puncten. 1. Das die Jüden zeitlich/ vnd bald im Anfang des gepredigten Evangelii, da die Aposteln noch gelebt/ sich zu den Fabeln gewendt/ vnd ihnen die Licenz genommen/ von den heiligen Patriarchen/ Richtern/ Königen vnd Propheten/ ganz vnverschamt zu richten/ was ihnen wolgefallen/ auff das sie solcher Gestalt die Wahrheit des Evangelii vnerdrücken/ vnd die Menschen von derselbigen zur Lügen abwendeten/ des sich nicht hoch zu verwundern. Denn/ da Christus kaum auferstanden war von den Todten/ vnd zwar eben am selbigen Tage zu früh/ als die Grabshüter den Priestern vnd Obersten im Volk solche neue Zeitung verkündigt/ hasten sie ihre Hoffnung auff Lügen/ gaben den Kriegsknechten Gelds gnung/ vnd lerten sie schwören: Sagt/ seine Jünger kamen des Nachts/ vnd stolen in/ weil wir schliefen: Matth. 28. Demnach sie denn an der Lügen so ein groß Wolgefallen/ hat sie auch Gott/ auß gerechtem Gerichte/ dem Lügengeist/ zur Straff vbergeben/ der sie mit Fabeln vnd Lügenstücken also gefangen/ verstrickt vnd verwickelt/ das sie nicht drauß kommen können/ sondern müssen dran erworgen/ ersticken/ sterben/ vnd verderben/ sampt allen/ die sich von ihnen haben einnehmen vnd verführen lassen.

2. Darnach werden den Jüdischen Fabeln zwo Eigenschaften zugeschrieben. S. Petrus nennet sie *μύθῳ σοφισμένῳ*, Fabulas doctas & sophisticatas, kluge Fabeln. Denn es gehören nicht schlechte vnd albere einfeltige Leute/ sondern verschmitzte/ vnd verschlagene/ listige vnd geschwinde Köpffe darzu/ solch Fabelwerck zu erichten/

Tauffpredigt vber einen Jüden.

11.

richten/ vnd der Gestalt auff einander zu richten/ daß es ei-
 nen Schein der Wahrheit hab/ vnd ein solch Ansehen/ da-
 durch die Leute geblendet werden. Die größte Sophistica
 aber ist/ daß sie die h. Schriffe schändlich verlernen/ vnd auff
 ihren Lügengand mit aller Gewalt ziehen. S. Paulus
 nent sie *μύθοι βιβλικοὶ καὶ γὰρ ἄωφοι*, Fabulas profanas
 & aniles, vngeistliche vnd altweltliche Fabeln/
 darumb/ daß sie zur Gottseligkeit durchaus nichts dienen/
 auch vom Geist Gottes nicht herkommen/ sondern sie rie-
 chen nach Adams Topff vnd Kopffe/ sind so viel nutz/ als
 der alten Weiber Tandmehrlein/ welche sie in den Spinn-
 stuben/ vorm Kachelofen/ jungen Leuten vnd Kindern/ zur
 Kurzweil erzehlen.

3. Gleichwol aber thun sie hierneben grossen Scha-
 den. Ursach/ in dem sie süß vnd sanfft einschleichen/ gern
 gehört/ vnd leichtlich behalten werden/ auch die/ so dersel-
 bigen gewohnt/ vnd sie in sich gesoffen/ schwerlich davon
 lassen/ führen sie die Leut ab von der Wahrheit
 zur Lügen vnd ewigen Verdammniß. Daher
 warnen die heiligen Aposteln mit so grossem Ernst/ vnd
 höchsten Trewen/ für diesem so schändlichen vnd schädli-
 chen Fabelwerck.

Auff daß wir aber solches alles/ was bisher auß den
 beyden Aposteln erzehlet worden/ desto besser verstehen/ vnd
 darbey vermercken/ wie hoch nötig ihre Warnung gewes-
 sen/ wollen wir ein einig Exempel/ von der Jüden Mes-
 sia, auff welchen sie noch warten/ daß er ihnen noch kom-
 men sol/ anziehen. Werden zwar bisweilen etwas zu la-
 chen kriegen/ aber vielmehr werden wir vns vber ihrer



Taufspredigt vber einen Jüden.

schräcklichen Blindheit vnd verstockten/ vbermachten
Bosheit/ zu verwundern vnd zu entsetzen haben.

Vor Drenzehen Jahren ist zu Halberstadt/
am Hart/ ein Jüde getauft worden/ welchem man in der
Taufe den Namen geben/ Christianus Gerson, dieser
hat nach seiner Widergeburt ein Büchlein aufgeben las-
sen/ der Jüden Thalmud genant/ darumb/ das es auß
dem grossen Jüdischen Thalmud gezogen/ vnd in demsel-
bigen/ die ganze Summa der Jüdischen Religion/ wie
es istiger Zeit vmb dieselbige beschaffen/ zusathmen gefast/
vnd in gewisse Capitel eingetheilt ist. Nun meldet solch
Büchlein im 13. Cap. von der Jüden Messia, das ihre Ras-
binnen vnd Doctores nichts gewisses von seiner Zukunfft
schliessen vnd berichten können/ so gar irre sind sie vber dies-
sem Artikel worden/ der doch der aller furnembsten einer
ist. Etliche schreiben ohne Schew/ vnd ganz vnverschamt/
Messias sey nicht kommen / vnd werde nimmermehr
kommen. Etliche tichten zween Messias/ einen armen vnd
einen reichen / doher / das die Propheten vnserm waren
Messias / welcher ist Jesus Christus/ vnser lieber HErr
vnd Heiland/ hochgelobt in Ewigkeit/ beydes zuschreiben/
Armut vnd Reichthumb/ tieffe Erniedrigung vnd hohe
Majestät/ grosse Schande / vnd grosse Herzlichkeit.
Denn hie auff Erden/ in den Tagen seines Fleisches/ ist
er arm vnd Elend gewesen/ bis er durch Leiden vnd Ster-
ben in seine Herrlichkeit eingegangen/ sich zur rechten
Hand der Krafft Gottes/ seines himlischen Vaters/ ge-
setzt hat/ vnd da sitzt er noch/ herrschet vnd regiert gewal-
tiglich vber Himmel vnd Erden/ vnd alles was drinnen
ist. Aber dieser Messias ist den Jüden viel zu verdacht-

lich/

Tauffpredigt vber einen Jüden.

lich/ mügen vnd wollen seyn nicht/ gassen noch immerdar
nach einem andern vnd bessern / der doch nicht kommen
wil/ daher werden sie irr vber den Prophetischen Weiss-
gungen/ vnd erträumen ihnen/ wie gesagt/ zweene Messias:
Einer sol seyn vnd heissen/ Ben Ioseph, ein Sohn
Ioseph/ arm/ veracht/ vnd elend/ welcher von Gog Ma-
gog werde vmbbrachte werden: Der ander sol seyn vnd
heissen Ben David, ein Sohn Davids/ reich vnd mechtig/
vnd der werde bey den Jüden grosse Wunder thun/ damit
sie auff Erden zu grossen Ehren vnd Gütern kommen/ den
zum Himmelreich/ oder zur ewigen Seligkeit/ da bedürffen
sie/ ihrer Rechnung nach/ keines Messias zu/ sie habens
zuvor in ihren Händen/ vnd istts ihnen Gott/ von Rechts
wegen/ zu geben schuldig/ weil sie Abrahams Samen sind/
vnd damit ihnen ihr Gehorsam vnd vberaus grosse Fröm-
migkeit bezalt werde. Aber hiermit haben ihre Irthum/
vom Messia/ noch kein Ende. Denn etliche geben für/
Messias sey schon vor langst zu Beulehem geborn/ liege
aber zu Rom fürm Thor vnter den Bettlern/ Aussätzigen/
Lamen/ Krancken/ vnd andern gebrechlichen Leuten/ sey
mit Ketten gebunden/ vnd liege gefangen sechs Tage in
der Wochen/ von einem Sabbath zum andern/ am Sab-
battage fallen die Ketten weg/ vnd werde Messias an ein
Weiberhaar gebunden/ welches er doch nicht entzwey reis-
sen dürffe/ damit der Sabbath nicht profanirt vnd enthei-
ligt werde. Wenn der Sabbath für vber/ nimpt das Weis-
berhaar seinen Abschied/ vnd muß der arme Tropff wider
in die harten kalten Eissen kriechen/ vnd darinn gefangen
liegen/ mit grossem Zorn/ Ungedult/ vnd Unwillen/ daß
er seine fromme Jüden zu erlösen/ sich selbst von seinen Ket-

4.

B. iij

ten vnd



5.

ten vnd Bänden/ auch von ein schlechten Weiberhaar/
nicht loß machen kan. Zu letzt sagen etliche/ Messias sey
noch nicht geborn/ sondern sol noch geborn werden. Wen
aber/ vnd wo/ zu welcher Zeit/ vnd an welchem Ort/ das
wisse niemand/ sol auch niemand darnach forschen vnd
fragen/ sind vbel zu Frieden/ mit denen/ die auß des Ers-
Vaters Jacobs Weissagung: Gen. 49. vnd auß des
Propheten Daniels siebentzig Jahrwochen: Dan. 9. sich
unterstehen die Zeit der Zukunfft Messia außzurechnen.
Ursach/ sie besorgen/ solche Rechnung bringe die War-
heit an Tag/ vberführe sie irer grossen mutwilligen Blind-
heit/ vnd dringe mit Gewalt auff Iesum von Nazareth/
welchen ihre VorEltern/ auß Haß vnd Neid/ gecreuzigt
haben/ daß er der ware Messias sey/ wie ers denn ist/ vnd
hindere ihn nichts dran der Jüden Leugnen/ Liegen vnd
Lestern/ damit sie nur ihnen selbst den größten Schaden an
Seel vnd Leib/ in Ewigkeit/ zufügen.

Das sind also der Jüden verwirzte Fabeln von des
Messia Person vnd Zukunfft. Von seinem Ampt schwa-
zen sie daher/ daß er das edle Volck der Jüden sol/ vnd wer-
de/ mit grosser Schwerdtsgewalt/ auß der Römer Händ
erlösen/ vnd wider gen Jerusalem bringen/ auff daß sie das
selbst/ in höchster Freyheit vnd Glückseligkeit/ vber alle
Heyden herrschen/ auffs köstlichste leben/ vnd in eitel Wol-
lüsten vmbher schwimmen/ gleich wie die Mücken/ wenn
sie in ein Honigtopff fallen. Wenn das geschehen/ als den
werde Messias seinem Volck ein vberaus herzlich Pan-
cket/ vnd köstlich Mahl bereiten lassen/ darzu auch die ab-
wesenden Jüden sollen beruffen werden. Denn so er in sein
Horn stossen wird/ dessen Schall den gansen Erdboden

wird

Tauffpredigt vber einen Jüden.

15.

wird erfüllen/ also/ daß man in allen Landen/ vnd in allen Ecken der Welt höre/ bald werden die Jüden auß allen Winkeln herfür kriechen/ wie die Meuse auß ihren Löchern/ wenn sie die Raken mausen hören/ vnd werden heuffig/ mit grossem Verlangen/ nach Jerusalem/ wie die hungerrigen Hunde/ zur Krippen eilen. Denn von ferne werden sie riechen die Braten an Spieß gesteckt. Wer wolte sich da lang seumen? Ey/ möcht jemand sagen/ was wirs da wol für köstliche Speisen geben? Was für Richten wird man da auftragen? Wolan/ wir wollen den Jüdischen Fabeln noch ein wenig zuhören/ auff daß wir sie desto besser kennen/ meiden/ vnd meiden lernen.

Walts der grosse Gott zu Schaffhausen. Denn die erste Tracht sol seyen/ ein grosser Walfisch/ erschaffen im Anfang der Welt/ am vierden Tage/ vnd nunmehr etliche tausent Jahr im Wasser erhalten vnd gespart bis auff diese Mahlzeit. Was ist nun vnserm HErrn Gott in so langer Zeit/ auff ein solch Fischlein/ vnd seinen Vnterhalt/ wol gangen? Denn alle Tage muß solcher Walfisch zu fressen haben einen andern Fisch/ dreyer Meilen wegs groß/ wie ihn die Jüdischen Rabinen eigentlich abgeztreckelt vnd aufgemessen haben.

1.

Auff den grossen Walfisch wird folgen ein grosser Vogel/ Tucha genant. Denn Federwilbret muß freylich auch darbey seyen/ vnd schmecke nicht vbel/ wie die Rabinen berichten/ wenn man sich der Fische müde gessen hat. Von diesem Vögelein schreiben sie/ daß es auff eine Zeit/ im fliegen/ ein Ey hat fallen lassen/ welches drey hundert Tannenbäume zerbrochen/ vnd sechzig Städte erseufft hat. Hüff Gott/ welch ein Jammer würd in der Welt ers

2.

folgt



folgt seyen/ wenn der Ey^r ein halb Schock/ diesem Bö^sgelein entfallen weren.

3.

Fürs dritte/ auff den grossen Vogel wird folgen der grosse Dchs/ am sechsten Tage des Anfangs aller Dinge geschaffen/ welchen auch die schreckliche grosse Sünd^{flut} nicht hat mögen decken noch ersäuffen. Also lebt er noch/ vnd wetdet alle Tage das Gras von tausent Bergen. Wenn er aber ein^e Suss thü wil/ seufft er auff einen Schluck so viel Wassers in sich/ als der Jorda in einem halben Jar/ mit stetem fließen/ zusammen bringt.

4.

Zum vierden/ der eingesalzen^e Fisch/ Kih^v vnd ander Fleisch/ in gleichen der allerfettesten Genß/ davon ganze Ströme mit Fettem fließen/ wollen wir geschweigen. Aber des guten süßen Mosts müssen wir gedencken. Der ist gewachsen im Paradies/ ligt noch in der Kelter unvergoren/ vnd wird gespirt zu diesem herrlichen guten Mut. Kein Auge hat diesen köstlichen Tranc^k jemals gesehen/ welchs wol zu glauben/ wird in auch/ ohn Zweifel/ forthin niemand/ weder zu sehen/ noch zu kosten/ bekommen. Gleichwol/ zur Bestetigung ihres Lügentands/ müssen ihnen allhie herhalten die schönen Wort/ Esa. Cap. 64. welche S. Paulus recht/ vnd ganz tröstlich/ auff's ewige zeucht/ 1. Corint. 2. Das kein Auge gesehen/ kein Ohre gehört/ vnd keins menschen Herß erfahren hat/ das hat Gott bereitet/ denen/ die ihn lieben.

Endlich/ wenn die Mahlzeit geschlossen/ vnd der Tisch auffgehoben/ wird ein fröhlicher vnd lustiger Hofftank gehalten werden/ in welchem Gott sichtbarlich form an der Spizen gehen/ vnd den Reyen führen wird. Dreche/ wie

wolt

wolt sichs anders schicken? Wachtens doch der Juden
 Vorfahren/ bey ihrem güldenem Kelberdienst/ in der Ara-
 bischen Wüsten/ auch also/ wie geschrieben steht: Das
 Volck sazte sich nieder zu essen vnd zu trin-
 cken/ darnach stunden sie auff zu spielen: Exod.
 32. 1. Corineh. 10. Was kriegen aber die Heyden von
 solchem gutem Muth? Bleibt nicht etwas von so reicher
 Kirbe für sie/ als für arme Bettler/ vber? Ja/ was vber-
 bleibt/ vnd die Juden nicht mügen/ werden sie vnter einan-
 der theilen/ darnach zu Jerusalem sich darmit auff den
 Marck sehen/ vnd den Heyden verkäuffen. Wie teuer?
 vnd was wollen sie mit dem Gelde machen? Aber hiervon
 gnung auff dñmal.

Sind das nun nicht alvetelische / kindische / vnd
 leppische Fabeln/ welcher billich zu lachen vnd zu spotten?
 Ja/ wenn sie nicht darneben auch vngeistlich weren/ vnd
 der Gottseligkeit grossen Schaden theten/darumb ist mit
 lachen vnd spotten allein nicht außgerichte/ wir haben noch
 viel ein anders vnd grössers darbey zu bedencken. Denn
 die schöne/ fürtreffliche/ vnd heilsame/ Göttliche Lere vom
 HErrn Messia, seiner Zukunfft/ Person/ Ampt/ Reich/
 vnd vnaussprechlichen Wohlthaten/ ist gleichwol durch
 solch Fabelwerck/ schändlich/ schändlich/ verkehrt/ vnd den
 Leuten/ zu ihrem ewigen Schaden vnd Verderben/ auß
 den Augen/ Ohren vnd Herzen gerissen/ wie an den ar-
 men/ verhrönten vnd bezauberten Juden/ so heutigs Tags
 leben/ vber ihren Lügen so fest halten/ vnd eine vnersetzli-
 che Feindschafft wider vnsern lieben HErrn Jesum Chri-
 stum/ vnd alles/ was ihn angeht vnd angehört/ tragen/

E

mit

Taufspredigt vber einen Juden.

mit wünschen/ fluchen/ leßern/ schenden/ vnd womit sie nur können vben/ zu sehen vnd zu greiffen ist.

Derwegen sollen wir ihr Fabelwerck also anhören vnd betrachten:

1.

Erstlich/ daß wir vns darbey erinnern vnser menschlichen Schwachheit/ vnd wie leichtlich wir von der Wahrheit abgeführt werden können. Keine Lügen ist so grob vnd vnverschämt/ wir geraten drein/ vnd halten sie für eitel Heiligtum/ wenn wir die Schrift faren lassen/ vnd vns Gott seinen heiligen Geist entzuecht. Als nicht im Bapstumb auch so gangen/ wie noch? Man sehe nur die Lombardische Historiam/ vnd andere ihrer heiligen Legenden/ sampt der Barfüßer Mönche Eulenspiegel/ an/ es wird sich freylich finden/ was wir geglaubt haben/ vnd für eitel Evangelium haben glauben müssen/ daß wir skund lachē/ vnd wundern vns der grossen vnbesonnenen Einfalt/ oder vielmehr Thorheit/ vnser Vorfahren/ vnd noch heutiges Tages/ vieler/ vieler ansehnlicher vnd vornehmer Leute/ allerley Standes/ denen es sonst an weltlicher Klugheit vnd Geschicklichkeit nicht mangelt/ hie aber sind sie lautere Kinder/ die sich wegen vnd wiegen lassen von allerley Wind der Lere/ durch Schalkheit der Menschen vnd Teufelschrey/ damit sie vns erschleichen/ zu verführen: Ephes. 4. Herr Gott erhalt vns/ sonst fallen wir/ vnd liegen/ vnd können vns nimmermehr wider auffrichten.

2.

Fürs ander / haben wir vns hierbey zuerinnern daß Teuffels Grimm vnd Bosheit wider Christus/ vnd seine Gemeine/ ja/ wider das ganze menschliche Geschlecht. Denn der ist der rechte Coryphæus in solchen Sachen/ ein Erstböswicht/ ein Vater der Lügen vnd Mörder

Taufspredigt vber einen Jüden.

19.

Wörter von Anfang: Johan. 8. der stiftt alles Unglück an/ treibs fort/ vnd lachts darnach in die Faust darzu/ weck er durch allerley Lügen vnd Fabelwerck die Menschen vñ die himlische Wahrheit/ vmb die ewige Seligkeit/ vnd/ mit einem Wort zu sagen/ vmb Christum Jesum/ vns von Gott gegeben vnd verordnet/ zur Weisheit/ zur Gerechtigkeit/ zur Heiligung/ vnd zur Erlösung/ bracht hat: 1. Cor. 1.

Zum dritten/ erinnern wir vns billich auch des gerechten Zorns vnd Gerichts Gottes/ davon S. Paulus schreibt/ 2. Thess. 2. Darfür/ daß sie die Liebe zur Wahrheit nicht haben angenommen/ daß sie selig würden/ wird inen Gott kräftige Irthüm/ imposturæ *ωίς γεαρ*, senden/ daß sie der Lügen gläuben/ auff daß gerichtet werden/ alle/ die der Wahrheit nicht gläuben/ sondern haben Lust an der Ungerechtigkeit. Von dieser schrecklichen/ vnd doch gerechten Straff/ hatte auch Christus selbs den Jüden insonderheit gepredigt/ vñ sie inen verkündigt/ Johan. 5. Ich kenne euch/ sagt er/ daß ihr nicht Gottes Lieb in euch habt. Ich bin kommen in meines Vaters Namen/ vnd ihr nempt mich nicht an. So aber ein anderer in seinem eignen Namen kommen wird/ den werdet ihr annehmen. Wer ist der Gesell/ der in seinem eignen Namen kömpt/ vnd bey der Welt ein grösser Gehör hat/ als der eingeborne Sohn Gottes vom Himmel? Johannis am 8. Cap.

3.

E ij

beschreibe

Taufspredigt vber einen Jüden.

beschreibt ihn der Herr gegen den Jüden also: Er ist in der Wahrheit nicht bestanden/ vnd die Wahrheit ist nicht in ihm. Wenn er die Lügen redet/ so redet er von seinem eygen. Denn er ist ein Lügner/ vnd ein Vater derselbigen. Kurz zuvor hat er ihn außdrücklich genent den Teuffel/ der kômpt mit Lügen/ auß seinem Eigenthum/ auffgezogen/ doch nicht in eigener gestalt/ da were er zu kênblich/ sondern er verstellt sich zum Engel des Lichts/ vnd führet mit sich falsche Aposteln vnd betriegliche Arbeiter/ die sich zu Christus Aposteln verstellen/ vnd die aller fürnemsten heiligsten Lerer/ Knecht vnd Diener Gottes seyn wollen: 2. Cor. ii. Wo der Zorn Gottes hin kômpt/ vnd dem Teuffel so viel erleubt wird/ da gehts schrecklich zu/ die Lügen steigt empor/ die Wahrheit geht vnter/ zu ewigem Verderben der Menschen/ die es mit ihrer Vndanckbarkeit/ vnd Verachtung des Göttlichen Wortis/ vmb Gott also verschuldet haben. Audiendus enim est Satanas, ubi non vult audiri CHRISTUS. Das haben die Jüden erfahren/ vnd stecken noch heutiges Tags in der Straff/ andern zur Warnung vnd Exempel: Rom. ii.

Derwegen sollen wir/ in Betrachtung dieses alles/ vnd zuvor auß des gerechten schrecklichen Gerichts Gottes/ wider die Verächter der Wahrheit/ nicht sicher seyn/ nichts vnser eigen Klugheit/ nichts vnsern eignen Kräfften zutrawen noch zuschreiben. Denn alles was wir vermögen/ viel zu schwach vnd gering/ ja/ für eitel nichts zu achten ist/ gegē des tausentlistigen bösen Feindes grosser Klug-

heit/

Tauffpredige vber einen Jüden.

heit/ behenden Griffen/ vnendlichen Künsten/ grosser vn-
 uerwundlichen Stärke/ Macht vnd Gewalt. Des tre-
 wen/ barmherzigen/ frommen Gottes Wort istis ganz
 vnd gar/ daß wir in dem Lichte seines Worts sehen das
 rechte/ warhaffte/ vnd lebendigmachende Licht/ Jesum
 Christum/ Psal. 36. Johan. 1 & 12. Dem haben wirs zu
 danken/ dem sollen wir auch/ neben gebürendem Fleiß/ am
 Wort fest zu hangen/ vnd nicht darvon zu weichen/ weder
 zur rechten noch zur linken/ stetigs mit Gebet in Ohren
 liegen: Heiliger Vater/ heilige vns in deiner
 Wahrheit: Dein Wort ist die Wahrheit: Joha.
 17. Abgötterey vnd Lügen laß ferne von mir
 seyen: Pro. 30. Weise mir/ HErr/ deinen Weg/
 daß ich wandele in deiner Wahrheit/ vnd erhal-
 te mein Herz bey dem einigen/ daß ich deinen
 Namen fürchte: Psal. 86. Zeige mir/ HErr/
 den Weg deiner Rechte/ daß ich sie beware bis
 ans Ende: Unterweise mich/ daß ich bewar
 dein Geseße/ vnd halt es von ganzem Herzen:
 Psal. 119. Amen.

Wie den versärten aber/ so sie nicht halbstarrig vnd
 offentliche Lasterer seyen/ sollen wir Gedult vnd Mitleis-
 den haben/ auch für sie Gott herzlich anruffen/ bitten vnd
 wünschen/ daß sie auß der dicken Finsternuß irer Irrthum
 errettet/ den hellen Glantz Göttlicher vnd seligmachender
 Wahrheit erlangen: Inmassen diesem unserm Eliaz wis-
 derfahren ist/ auß sonderlichen Gnaden Gottes/ der ihn/
 als einen Brand/ mitten auß dem brennenden Fewr der



Taufspredigt vber einen Jüden.

Jüdischen Fabeln/heraus gerissen hat: Darvon hernach weiter Meldung geschehen wird/ wollen zu erst den Text S. Petri kürzlich vollend absolvira.

II.

Von der Wahrheit Cristlicher Religion.

Text.

Wir haben nicht den klugen Fabeln gefolgt/ da wir euch kund gethan haben/ die Krafft vnd Zukunfft vnsers HErrn Jesu Christi: sondern/ wir haben seine Herzigkeit selber gesehen/ ic.

Jüdischen vnd Heidnischen Fabeln/ Bepöstlichen/ vnd Türckischen Grewel/ sampt allen erlichlichen falschen Gottesdiensten vnd Leren/ wie klug vnd scheinbar/ wie lieblich vnd angenehm/ für menschlichen Augen vnd Ohren/ sie immermehr seyen mögen/ seht S. Petrus entgegen die Wahrheit Christlicher Religion/ oder das h. Evangelium/ welches er nent eine Verkündigung der Krafft vnd Zukunfft vnsers HErrn Jesu Christi. Denn obwol JESUS Christus in grosser Armut geboren ist/ vnd hernach ein geringen Stand vnd Wandel/ vor Menschen/ auff Erden/ geführt hat: Hat er doch hierneben seine Göttliche Krafft vielfaltiger Weise herfür

Tauffpredigt vber einen Jüden.

herfür leuchten lassen/ vnd zu letzt auch/ durch Leiden vnd Sterben/ Auferstehen vnd Himmelfahrt/ dem Teuffel sein Reich gar zerstört/ vmb welches Werck's willen er auff Erden kommen/ wie S. Johannes sagt/ 1. Johan. am 3. Der Sohn Gottes ist erschienen/ daß er des Teuffels Werck zerstöre. Vnd Er selbs/ Iesus CHR Istus / sagt/ Matth. 18. Des Menschen Sohn ist komen/ selig zu machen/ das verlorn ist. Solcher Gestalt haben die lieben Aposteln das Evangelium kund gethan Jüden vnd Heiden/ vnd das ist auch die rechte Catholische/ Apostolische/ Christliche Lehre/ wider/ welche so etwas streitet/ es siehe gleich in der Jüden Thalmud/ ins Türcken Alcoran/ oder ins Pappsts Decreten/ vnd seiner Creaturen/ der Varsüßer Mönche/ Eulen Spiegel/ ja/ wenns auch ein Engel vom Himmel geredt hette/ daß sey verflucht/ zu tieffst in die Helle hinein/ vnd nimmermehr wider heraus: Amen. Galat. 1.

Wöcht jemand sagen/ wenns nur mit der Lere des Evangelii auch gewiß were/dz man sich genklich darauff zu wagen vnd zu verlassen. Wie? wennes die Aposteln erticht hettten/ oder hettens von andern klugen Fabulanten empfangen/ angenommen/ vnd außgebreitet? Darauff antwortet S. Petr': Mit nichten: Wir haben nicht den klugen Fabeln gefolgt. Verufft sich aber dargegen: 1. Auff die αὐτοψία v, auß hören vnd sehen: 2. Auff der Propheten Zeugnuß. Wollens kärklich betrachten.

I.

Wir haben seine Herligkeit selber gesehen/ da

er em

Taufspredigt vber einen Jüden.

er empfieng von Gott dem Vater Ehre vnd
Preis/ durch eine Stimme/ die zu ihm ge-
schach/ von der grossen Herzigkeit/ dermas-
sen: Disz ist mein lieber Sohn/ an dem ich
Wolgefallen hab. Vnd diese Stimme ha-
ben wir gehört vom Himmel bracht/ da wir
mit ihm waren auff dem heiligen Berge.

In diesen Worten sihet der h. Apostel Pe-
trus auff die Wunderschöne vnd hochtröstliche Hi-
storiam von der Verklärung Christi/ welche drey
Evangelisten/ mit besonderm grossen Fleiß/ beschrieben/
S. Matthaeus am 17. S. Marcus am 9. vnd S. Lu-
cas auch am 9. Capitel/ S. Petrus zeucht sie allhie kurz
zusammen/ vnd/ weil ers alles sezt auff sehen vnd hören/
wollen wir vernemen/ was er denn/ neben andern zweyen
Aposteln/ Jacobo vnd Johanne/ gesehen vnd gehört hat/
darauff wir gewiß seyen können/ das Evangelium von ih-
nen gepredigt/ sey kein Menschengeticht/ sondern Göttliche
Offenbarung.

Anfänglich vom sehen zu reden/ wird billich gefragt/
was haben denn die drey Aposteln gesehen/ darauff sich S.
Petrus allhie so steiff vnd fest beruffe/ vñ nents eine Herz-
ligkeit/ μεγαλειότητα, eine fürtreffliche/ sonderliche/ gros-
se Ehr/ vnd Masestat/ die/ folgender Beschreibung nach/
aller menschen Hoheit vnd Herzigkeit in dieser Welt weit
obereriffe. Erstlich/ haben sie gesehen die Verklärung
Christi/ von welcher die heiligen Evangelisten vnterschied-

lich



443
Taufspredigt vber einen Jüden.

25.

lich melden/ daß die Gestalt seines Angesichts anders worden sey/ vnd habe geleuchtet wie die Sonne. Sein Kleid aber sind helle/ vnd sehr weiß/ weiß wie der Schnee/ daß sie kein Ferber/ auff Erden/ so weiß machen kan/ vnd glänzen als ein Liecht. Fürs ander/ haben sie gesehen zween Männer auß jener Welt herfür gehen/ oder erscheinen/ nemlich/ Mosen vnd Eliam/ welche mit himlischer Klarheit angethan/ sich bald zu Christo funden/ bey ihm gestanden/ vnd mit ihm eine Rede gehalten/ davon die drey Aposteln solcher massen erfrewet/ daß sich S. Petrus hören lassen: Meister/ hie ist gut seyn/ wiltu/ so wollen wir drey Hütten machen/ dir eine/ Mosi eine/ vnd Elias eine. Zum dritten/ als Petrus diese Wort noch geredet/ ist eine liechte helle Wolcken kommen/ welche sie vberschattet vnd vberzogen/ sind des erschrocken/ weil sie nicht gewußt/ was es bedeute/ oder werden wolle/ biß sie eine Stimme auß der Wolcken fallen vnd schallen hören/ **JESVS** von Nazareth sey des/ der in der hellen Wolcken daher gefahren kommen/ eingeborner vnd allerliebster Sohn/ seines Herzen wolgefallen. So viel haben sie gesehen: 1. Christi Verklärung: 2. Mosen vnd Eliam: 3. Eine liechte Wolcke/ von welcher sie bedeckt/ vnd vberschattet worden.

Was haben sie gehört? zweyerley. Erstlich/ daß Moses vnd Elias mit Christo eine Unterrede vnd Gespräch gehalten. Wo von? von seinem Außgang/ welchen er zu Jerusalem erfüllen sollte: das ist/ von seinem Leiden vnd Sterben/ auch von seiner frölichen Auferstehung vnd Himmelfart/ dadurch er sein Volk/

D

auß

Zauffpredigt vber einen Jüden.

auff Jüden vnd Heiden/ durch Einigkeit des Glaubens an ihn versamlet/ auff dem Diensthause des hellischen Pharaonis/ vnd dem ganken Reiche der Sünden ins ewige Leben einführen solte/ gleich wie vor Zeiten Moses die Kinder Israel auff Egyptenland/ durchs rote Meer/ vnd die Arabische wilde Wüsten/ ins gelobte Land eingeführet hatte. Wie ein herzlich Gespräch wird das gewesen seyn. Moses hat von seinem Exodo wissen zu reden. Elias/ im Namen aller Propheten/ hats gedeutet auff den Exodum Christi, Christus gehts alles willig ein/ vnd nimpt den betrübten Ausgang auff dieser Welt auff sich/ damit er vns einen frölichen Eingang in Himmel erwerbe. Was ists Wunder/ daß Petrus/ mit seinen Gesellen/ dieser Predigt gerne lenger zugehört hette? Zum andern/ haben die lieben Aposteln gehört/ wie Gott der Vater selbs/ mit klarer heller Stimm/ auß der liechten Wolcken/ an solchem Gespräch den Beschluß gemacht. Denn weil sich Christus/ mit allem Gehorsam/ in den vorgehaltenen Exodum zu Jerusalem willig eingeben/ lest er sich hören: Dis ist mein lieber Sohn/ an dem ich Wolgefallen habe/ den solt ihr hören. Das ist die Stimme/ von welcher S. Petrus sagt/ daß Christus/ durch dieselbige/ τὸ κτῆνος τοῦ θεοῦ, Ehre vnd Preis/ von Gott dem Vater empfangen habe. Denn erstlich bezeugt hiermit der allmächtig Gott/ für zweyen Zeugen auß jener Welt/ vnd für dreyen Zeugen auß dieser Welt/ daß der verklärte Jesus von Nazareth/ wie veracht/ arm vnd elend/ er auch auff Erden sey/ dennoch sein eingeborner/ allerliebster Sohn/ vnd der versprochne Messias sey/ von welchem Moses/

Elias/

Tauffpredigt vber einen Jüden.

Elias/ vnd alle Propheten geweissagt/ darzu vom Him-
 mel herab gesand/ daß er des teuffels Reich zerstöre/ vnd
 ein ewig Himmelreich/ vnter den Menschen/ anrichte.
 Zum andern bezeugt Gott/ daß er an dieses/ seines lieben
 Sohns/ kindlichem Gehorsam/ vnd an alle seinem Thun
 vnd Lassen/ ein herzlich Wolgefallen habe/ nem auch das
 selbige an für eine vollige Bezahlung für aller Welt Sün-
 de/ auff daß alle/ die an ihn gläuben/ durch ihn/ Gottes
 angenehme/ vnd wolgefellige liebe Kinder werden. Zum
 dritten/ gibt er seiner Lere Zeugnuß/ daß sie Göttlich sey/
 vnd auß seinem/ des ewigen Vaters/ eignem Herzen ih-
 ren Ursprung habe/ setzt ihn auch zu einem Doctore uni-
 versi mundi, zu einem Lerer der ganzen Welt/ den jeder-
 man hören sol/ wer nur begert zu warer Erkantnuß Got-
 tes/ vnd seines Willens/ zu kommen/ vnd dadurch ewig
 selig zu werden. Wie eine herzliche köstliche Predigt/ mit
 welcher auch dieser allerheiligste Synodus sich geendet.
 Den als die drey Jünger des Herrn/ nach großem Schre-
 cken/ sich wider an Kräfte erholte/ vnd auffgesehen/ ist
 kein Moses noch Elias mehr vorhanden gewesen/ sie hat-
 ten ihren Abschied genommen/ die helle liechte Wolcke/
 welche sie vberschattet/ vnd darauß des Vaters Stimme
 gefallen/ war auch vergangen/ vnd endlich sahen sie nie-
 mand denn Jesum alleine/ in seiner vorigen vnd schlechten/
 Menschengestalt/ seine Verklärung hat ein Ende/ anzu-
 deuten/ daß die Stimme des Vaters nicht auff Mosem
 oder Eliam/ sondern allein auff Jesum von Nazareth
 gemeinet sey/ der ist der liebe Sohn des ewigen Vaters/ vnd
 seines Herzen Wolgefallen/ vnd aller Welt Doctor vnd
 Lerer zur ewigen Seligkeit.

D ij

Auff



Taufspredigt vber einen Jüden.

Auff diß herrliche Gesichte zeucht sich allhie S. Petrus/ vnd bewähret darmit den Grund ewangelischer Wahrheit. Damit auch niemand an demselbigen zweiffel/ gedendet er des Orts/wo es geschehen sey: Diese Stimme/ sprichet er/ haben wir gehört vom Himmelbracht/ da wir mit ihm waren auff dem heiligen Berge. Dieser Berg ist gewesen der hohe Berg Thabor in Galilæa/vñ wird genent der heilige Berg/ vmb dieser allerheiligsten Geschichte willen/ dadurch auch die heiligen Aposteln in ihrem Ampt/ vnd Lere des h. Evangelii von Christo/dermassen sind gestärckt worden/ daß sie/ mit grosser Beständigkeit/ öffentlich von derselbigen gezeugt haben/ vnd sich keine Gefahr daran lassen hindern/ oder darvon abschrecken/ wie sonderlich zu sehen in der Aposteln Geschichte am 4. vnd 5. Capitel. Da da die Hohenpriester/ Schriftgelehrten vnd Eltesten zu Jerusalem Petro vnd Iohanni mit Ernst geboten/ sie sollten sich aller Dinge nicht hören lassen/ noch leren in dem Namen **IESU**/ antworteten sie vnd sprachen: Richtet ihr selbst/ obs für Gott recht sey/ daß wir euch mehr gehorchen/ denn **Gott**. Wir können ja nicht lassen/ daß wir nicht reden solten/ was wir gesehen vnd gehört haben. Vnd als die Hohenpriester/ sampt ihrem Raht/ die beyden Aposteln zum andermal fürforderten/ vnd sie zu rede setzten/ vber dem/ daß sie/ ihrem Gebot zu wider/ im Namen **IESU** gelehrt hetten/ antwortet Petrus: Man muß Gott mehr gehorchen als den Menschen. Der Gott vnser Väter

hat

Tauffpredigt vber einen Jüden.

hat Jesum aufferweckt / welchen ihr erwürgt
 habt / vnd an ein Holz gehangen. Den hat
 Gott durch seine rechte Hand erhöhet zu einem
 Fürsten vnd Heiland / zu geben Israel Busz
 vnd Vergebung der Sünden. Vnd wir sind
 Zeugen vber diese Wort / vnd der heilige Geist /
 welche Gott gegeben hat / denen / die im gehor-
 chen. Vber dieser Antwort erzürnten die h. Väter sol-
 cher massen / daß sie die Aposteln mit Ruthen steupen lies-
 sen / vnd geboten ihnen auffz new / in dem Namen Jesu
 nicht zu reden. Sie giengen aber frölich von des
 Rahts Angesicht / daß sie würdig gewesen wa-
 ren / vmb seines Namens willen Schmach zu
 leiden / vnd hörten nicht auff alle Tage im Tem-
 pel / vnd hin vnd her in Häusern / zu leren vnd
 zu predigen das Evangelium von Jesu Chris-
 to.

Das sey also / in einer Kürze / gnungsam vom ersten
 Grunde evangelischer Wahrheit / darauß wir vernommen /
 wie die heiligen Aposteln zu solcher Lere kommen sind / vnd
 mit was grosser Frewd vnd Beständigkeit sie / durch alle
 Gefahr hindurch / dieselbige getrieben / dieweil sie Gottes
 selbs Offenbarung vnd Zeugnuß im Herzen hatten / daß
 es Göttliche Wahrheit vnd Weißheit were. Darumb wir
 auch bey solcher Christlichen Lehr vnd Religion / bis in den
 Tod hinein / fest vnd beständig bleiben sollen. Wollen nun
 auch vom andern Grund etwas hören.

D iij

Wir



II.

Wir haben ein festes prophetisches Wort/ vnd ihr thut wol/ das ihr darauff achtet/ als auff ein Liecht/ das da scheint in einem tuncckeln Ort/ biß der Tag anbreche/ vnd der Morgenstern auffgehe in ewern Herzen.

Weswol der erste Grund Christlicher Religion an ihm selbs so fest/ so steiff vnd starck ist/ daß er in Ewigkeit wol wird vnmanggerissen bleiben: Dennoch berufft sich S. Petrus auch weiter auff die Zeugnuß der h. Propheten im alten Testamente/ darumb daß sie/ als heilige Gottes Menschen/ nicht auß engem menschlichen Willen/ sondern getrieben von dem h. Geist/ von der Krafft vnd Zukunfft Jesu Christi zuvor verkündigt vnd geweissagt haben. Welches alles hat erfüllet werden müssen. Da nun etwas an vnserm lieben Herren Jesu zu befinden/ daß bey den h. Propheten altes Testaments kein Zeugnuß hette/ oder die Propheten hettten etwas von Christo zuvor verkündigt/ dessen Erfüllung bey vnserm lieben Heilande nicht zu spüren/ da würde an vnser Christlichen Religion nicht ohn Ursach gezweifelt. Aber alles/ was die h. Schrift jemals von der Zukunfft Messiae verkündigt hat/ daß ist an Jesu von Nazareth reichlich vnd augenscheinlich erfüllet worden. Darumb an vnser Christlichen Religion niemand zu zweiffeln Ursach hat/ vnd ist einmal gewiß/ für alle mal/ wer denn Propheten gläubt/ der gläubt auch vnserm Herrn Christo/

wie

Taufspredigt vber einen Jüden.

31.

wie er selbs zu den Jüden sagt/ Johan. 5. Wenn ihr Mosi gläubtet/ so gläubtet ihr auch mir/ denn er hat von mir geschrieben. Vnd kurz zuvor: Sucht in der Schrifft/ denn ihr meinet/ ihr habt das ewige Leben drinnen/ vnd sie ist/ die von mir zeuget. Daher berufft sich auch Christus immerdar auff die Schrifft/ seine Aposteln vnd Evangelisten desgleichen/ vnd S. Paulus spricht auß drücklich: Ir seyt erbauet auff den Grund der Aposteln vnd Propheten/ da Jesus Christus der Eckstein ist: Eph. 2. Derwegen preiset allhie S. Petrus das Wort der Propheten hillich/ nents ein fest prophetisch Wort/ vnd vermanet auff dasselbige mit Gleichacht zu geben/ als auff ein Liecht/ das da scheint an einem tuncel in Orte/ bis der Tag des h. Evangelii anbreche/ vñ der Morgenstern/ ja/ die Sonne der Gerechtigkeit: Mal. 4. Jesus Christus/ mit vollem Schein vnd Glanz seines allerheiligsten vnd seligsten Erkenntniß/ in vnsern Herzen auffgehe. Solche Vermanung ist zwar fürnemlich auff die Jüden gerichtet/ welche der Propheten Wort vor sich hatten/ vñ viel darvon rühmten/ aber durch eigne Außlegung dasselbige verkerten/ vnd sich selbs verführten: doch geht sie vns auch an. Den die ganze Gemeine Jesu Christi/ auß Jüden vnd Heiden versamlet/ auff der Aposteln vnd Propheten Grund erbauet ist/ wie wir zuvor auß S. Paulo vernommen haben. Hiers von were wol weitläufftiger zu reden/ vnd alles mit meh-

rem

id
ff
in
ro

es
ist/
leis
uff
ars
g
h.
vor
er
ben
les
ten
ing
an
ele.
nffe
rech
mb
Dr
Dro
isto/
wie

Taufspredigt vber einen Jüden.

rern Zeugniſſen altes vñ neuen Testaments zu beſtercken: aber die Zeit leidets nicht. Wollen allein bey voriger Hiſtorien bleiben/ vnd beſehen/ wie ſie mit dem prophetiſchen Wort einſtimme/ vnd damit ſol zugleich dieſe Predigt geſchloſſen werden.

Erſtlich/ wer Moſes vnd Elias/ die ſich allhie bey Chriſto auff dem h. Berge befunden/ vnd öffendlich haben ſehen laſſen/ geweſen/ was ſie von Chriſto geweiffſage/ vnd wie ſie vber ſeiner Lehr vnd Ehr/ wider allen falſchen Gottesdienſt vnd Irthum/ geehfert/ das ſind man in Moſes büchern/ vnd in der Propheten Schriften/ nach aller Länge/ kurz/ ſie ſind heilige Männer Gottes/ vnd ſeine trewe liebe Diener geweſen/ im Volck Iſrael/ vber welchen irem Dienſt ſie viel Widerwertigkeit außgeſtanden/ biß ſie Gott auß dieſer Welt abgefordert. Vnd Moſes zwar iſt eines natürlichen Tods geſtorben/ vnd von dem H. Ern/ dem ewigen Sohn Gottes/ ſelbe/ in einem Thal/ im Lande der Moabiter/ begraben worden. Aber ſein Grab hat niemand erfahren/ iſt auch Moſes hernach niemals von jemand geſehen worden/ biß ihn Gott der Vater/ nach viel hundere Jahren/ auff den Tag der Verklärung Chriſti/ ſeinem lieben Sohne zu Ehren/ auß jener Welt mit ſich bracht hat/ da iſt er von den dreyen Apoſteln/ Petro/ Jacobo vnd Johanne/ geſehen vnd erkanet worden. Elias der Prophet/ iſt nicht wie Moſes/ oder wie andere Menſchen/ geſtorben/ ſondern/ auff einem feurigen Wagen/ lebendig gen Himmel geholt vnd eingeführt worden. Von ſolcher Zeit an hat man auch nichts weiter von ihm gehöre/ biß auff die Zeit Malachiae/ deß letzten Propheten/ der von ſeiner Zukunft geweiffſagt/ kurz vor dem groſſen vnd ſchräcklichen

Tage

Tauffpredigt vber einen Jüden.

Tage des HERRN/ Mal. 4. Wiewol nun solche Weiss-
 sagung an dem grossen Manne/ Johanne dem Teuffer/
 erfüllet worden/ Luc. 1. Matth. 11. Marc. 9. so hat doch
 nichts desto weniger der Allmächtige GOTT auch
 Eliam selbs/ in eigener Person/ in den Tagen des Messiae
 herfür bringen wollen/ vnd hat in/ neben Mose/ mit him-
 lischer Klarheit angethan/ auff diesen grossen Reichstag
 bracht/ öffentlich zu bezeugen/ daß Moses/ vnd aller Pro-
 pheten Weissagung/ von der Zukunfft Messiae/ in Jesu
 von Nazareth erfüllet sey.

Zum andern/ was das Gespräch Moses vnd Eliae
 mit Christo/ von seinem Ausgang zu Jerusalem/
 anlangt/ das hat freylich auch seinen Grund in heiliger
 Schriffe/ denn das ganze Gesez mit allen seinen Opffern/
 Schatten/ vnd Vorbildern/ gehöre hieher/ desgleichen
 auch alle Propheten/ mit allen ihren Weissagungen/ wie
 Christus selbs sagt/ Matth. 11. Alle Propheten vnd
 das Gesez haben geweissagt bisz auff Johan-
 nem. Vñ er ist Elias/ der da sol zukünfftig seyn:
 das ist/ wie es der Engel Gabriel gegen seinem Vater Zas-
 charias erkläret/ der im Geist vnd Krafft Eliae für
 dem HERRN hergehen/ die Herzen der Väter
 zu den Kindern/ vnd die Ungläubigen zu
 der Klugheit der Gerechten bekern/ vnd dem
 HERN ein bereit Volck zurichten sol: Luc. 1.
 Insonderheit gehört auß Mose hieher das Bilde des
 Sündopffers/ welches am Tage der Versöhnung/ auß-

E

ferhalbe



Auffspredigt vber einen Jüden.

serhalbe des Lagers / mit Feyer mußte verbrand werden: Levit. 16. das deutet die Epistel an die Hebraer / am 13. Ca. also: Welcher Thierer Blut getragen wird / durch den Hohenpriester / in das Heilige für die Sünde / derselbigen Leichnam werden verbrand außser dem Lager. Darum auch Jesus / auff daß er heiligte das Volck / durch sein eygen Blut / hat Er gelitten außsen für dem Thor. Das ist sein Ausgang gewesen auß Jerusalem. Wie er aber auß der Welt zu Gott gangen ist / des ist Elias ein Fürbild gewesen. Denn gleich wie Elias einen schweren Lauff hie auff Erden geführt / aber nach demselbigen / auff einem feurigen Wagen / gen Himmel / in die ewige Freude zu fahren bekommen: Also hat auch Christus zu erst einen harten Stand / in den Tagen seines Fleisches zu führen / vnd einen sauren Gang zum Vater / durch Leiden vnd Sterben / thun müssen / ehe er in seine Herzigkeit eingegangen. Da er aber von Todten auferstanden / vnd an die vierzig Tage seinen Jüngern sich lebendig erwiesen / ist er endlich mit einem Triumph vnd grosser Herzigkeit / gen Himmel gefahren: Colos. 2. Ephes. 4. allda Er sitzt zur Rechten Gottes: Marc. 16. Eph. 1. Wie hiervon die Propheten klar geweissagt: Psal. 24. 47. 68. Mich. 2. Vnd ist solchs in der Wolcken Seule / die das Volck Israel / in der Arabischen Wüsten geleitet / auß / vnd ein geführt / auff das schönste abgebildet worden: Exod. 40. Numer. 9.

Zum dritten vnd letzten / wo finden wir aber im alten

Testas

453.

Testament/ oder bey den Propheten/ die Wort/ welcher sich in dieser Historien der Allmächtig Gott gebraucht: **Diß ist mein lieber Sohn/ an dem ich ein Wohlgefallen habe/ den solt ihr hören?** Fürwar eine grosse Ehr/ ist der h. Schrifft/ daß Gott der Vater/ auff diesem grossen Reichstage/ seine grosse Geheimnuß mit ihren Worten ausspricht/ sie dadurch/ als sein Wort/ confirmirt, vnd vns in dieselbige gewiesen haben wil. Wo stehen denn nun die Wort: **Diß ist mein lieber Sohn?** Im andern Psalm/ des Königlich Prophezen Davids/ da sich der HERR Messias/ vnter andern Worten/ also hören lest: **Ich wil von einer solchen Weise predigen/ daß der HERR zu mir gesagt hat/ du bist mein Sohn/ heute habe Ich dich gezeuget.** Solche Wort werden auch von Christo außgelegt/ durch S. Paulum/ Actor. 13. vnd in der Epistel an die Hebræer geschrieben/ am 1. vnd 5. Capitel. Summa/ der ganze Psalm ist eine fürtreffliche Weissagung von dem HERRN Messia/ seiner Person/ Ampt/ Reich/ Regiment/ Feinden vnd Freunden/ vnd wie es jedem Theil drüber gehen sol. Drum er mit höchstem Fleiß sol betrachtet werden/ sich auch ein jeder mit Glaubens gehorsam darnach halten/ damit er nicht/ durch Ungehorsam seinen Kopff an diesem Eckstein entzwey lauffe: Psal. 118. Esa. 28. Matth. 21. Fürs ander/ wo stehen die Wort: **An dem ich ein Wohlgefallen habe?** Im Prophezen Jesaia am 42. Capitel: **Sihe/ daß ist mein Knecht/ ich erhalte ihn/ vnd mein Außerwelter/ an**

E ij ter/ an

Taufspredigt vber einen Jüden.

ter/an welchem meine Seele Wolgefallen hat. Ich habe ihm meinen Geist gegeben/ Er wird das Recht vnter die Heyden bringen. Diesen Text zeucht S. Matthaenus außdrücklich auff die Person vnd Ampt des H. Erren Christi/ da er schreibt/ es sey an ihm erfüllet worden was Esaias gesagt hat: Sihe/ das ist mein Knecht/ den ich erwelt habe/ vnd mein Liebster / an dem meine Seele Wolgefallen hat. Ich wil meinen Geist auff ihn legen/ vnd er sol den Heyden das Gericht verkündigen: Matth. 12. Es rühmt aber allhie der Allmächtige Gott seines lieben Sohns vollkommenen Gehorsam/ welchen er ihm/ in knechtes Gestalt/ bis zum Tod am Creuz geleistet/ vnd bezeugt/ daß er durch solchen Gehorsam mit dem menschlichen Geschlecht versönet sey/ der Gestalt/ daß alle/ vnter allen Völkern vnd Heyden/ die sich durch das Wort Gottes/ oder durch die Predigt des h. Evangelii, richten/ vnd zum Glauben an Christum gewinnen lassen/ Vergebung ihrer Sünden/ Leben vnd Seligkeit haben sollen. Vnd solches wird auch ferner auff's herzlichste außgeführt/ vnd bestetigt/ nicht allein im folgenden Text dieses Capitels/ sondern auch in vielen folgenden ganzen Capiteln/ zu förderst im 53. da mit klaren Worten geschrieben steht: Der HERR warff vnser aller Sünde auff ihn. Er ist vmb vnser Missethat willen verwundet/ vnd vmb vnser Sünde willen zerschlagen. Die Straffe ligt auff ihm/ auff daß wir Friede hetten/ vnd durch seine Wunden

sind

Zauffpredigt vber einen Jüden.

sind wir geheilet. Item: Durch sein Erkant-
 muß wird er/ mein Knecht/ der Gerechte/ viel
 gerecht machen: Denn er tregt ihre Sünd.
 Fürs dritte/ noch eins: Wo stehen denn die Wort: Den
 solt ihr hören? Hie sihet Gott der HERR in Mosens/
 durch welche er hatte den Kindern Israel weissagen lassen:
 Einen Propheten/ wie mich/ wird der HERR/
 dein Gott/ dir erwecken/ auß dir/ vnd auß dei-
 nen Brüdern/ dem solt ihr gehorchen. Vnd
 ich wil ihm meine Wort in seinen Mund ge-
 ben/ spricht der HERR/ vnd er sol zu ihnen re-
 den/ alles/ was ich ihm gebieten werde. Vnd
 wer meine Wort nicht hören wird/ die er in
 meinem Namen reden wird/ von dem wil ich
 fordern: Deuter. 18. Da findet sich der Text sampt
 der Glossen. Christus wird verordnet vnd bestetigt zum
 Catholico Doctore universi mundi, zum allgemeinen
 Lerer der ganzen Welt/ welchen jederman hören/ vnd nach
 seiner Lere alle leren/ auch Moses vnd der Propheten/ ver-
 stehen/ vrtheiln/ vnd richten sol. Darumb waren auch
 Moses vnd Elias auß dem Synodo schon abgetreten/ vnd
 liessen sich nicht mehr sehen/ als die Stimme vom Him-
 mel herab/ auß der Wolcken bracht war: Disz ist mein
 lieber Sohn/ an dem ich Wolgefallen habe/
 den solt ihr hören. Solcher massen haben auch diese
 herzlich Weisagung auff Jesum von Nazareth gedeutet/
 S. Johannes/ Joh. 1. vnd S. Petrus/ Actor. 3. als



Taufspredigt vber einen Jüden.

trewe Schüler vnd Zuhörer Gottes/ auff diesem heiligen Berge/ von welchen es auch andere gehöret/ gegläubet/ vnd immerdar/ von einer Zeit zur andern/ fore gepflanzt/ biß zu letzt auch/ ist am Ende der Welt/ der fröliche vnd liebe-liche Morgenstern/ **YESVS CHRYSIVS**/ durch die Predigt des heiligen Evangelii, in diesen Lan- den/ vnd in vieler tausent menschen Herzen/ mit Macht auffgegangen ist. Darfür sey Gott Vater/ Gott Sohn/ vnd Gott heiligem Geist/ Lob/ Ehr/ vnd Preis/ von Ewigkeit zu Ewigkeit/ Amen.

*

**Beschluß/ vnd Er-
innerung von fürhabender
Judentauffe.**

Also haben ewer C. L. diß-
mals Bericht angehört von zwey-
en Stücken: Erstlich von Jüdischen Sas-
beln/ für welchen wir/ wie auch für allen/
andern menschen Lügen/ Träumen/ vnd Geboten/ treu-
lich ge-

lich gewarnt seyen sollen: Darnach / von Wahrheit vnd Beständigkeit Christlicher Religion / welche sich gründet auff der Aposteln eygne Erfahrung / vnd auff klare Weissagung der Propheten alten Testaments / von denen geschrieben steht / Actor. 10. Alle Propheten geben diesem Jesu von Nazareth Zeugnuß / daß in seinem Namen Vergebung der Sünden empfangen sollen / alle / die an ihn glauben. Vnd außser diesem Namen ist kein Heil / weder im Himmel noch auff Erden / Actor. 4. Amen.

Wen wollen wir / im Namen Gottes / zum Werk der h. Tauff / mit gegenwertigen vnserm Candidato, schreiten / welcher ist ein geborner Jüd / von Franckfurt am Mayn / bisher Elias genant / wie im Eingang auch gemeldet worden. Er hat aber sein Judenthum verlassen / vnd sich zum Christenthum bekert / auß Gottes sonderlichen Gnaden / durch solche Gelegenheit. In seiner Jugend / ehe er in Ehestand getreten / ist er von seinen Eltern nach Prage geschickt worden / alda die Hebraische Sprach bey den Jüden / in ihrer Schul / zu studiren. Als er nun in die Hebraische Bibel geführt worden / hat er beginnen zu mercken / sonderlich auß der Weissagung des Ers Vaters Jacobs / es müsse die Zeit Messia fürüber seyn / weil das Scepter von Juda hinweg genommen / vnd die Jüden / in so viel hundert Jahren / sich auß ihrem Elend nicht erheben mügen. Auch hat er gemerckt / daß die Propheten von Christo / vnd seinem Reich / viel anders reden / denn daß es von einem weltlichen Könige / vnd ver-

geng.

Fauffpredigt vber einen Jüden.

genglichen Königreiche/ könne verstanden werden. Ob
ihm nun wol seine Rabinen vnd Præceptores von dem
klaren Texte auff die Thalmudischen Glossen gewiesen/
vnd mit Gewalt drauff gedrungen/ er müsse den Ausles-
gungen/ der Rabinen/ mehr trawen vnd gläuben/ als dem
blossen Texte der Bibel: Hat doch solchs seinem Gewiss-
sen nicht gnung thun/ noch er damit zu Frieden seyn könn-
nen/ sondern der Biblische Text hat ihm immerdar in Oh-
ren gelegen/ vnd alle Rabinische Glossen weit vberschrien.

NOTA:

Der Thalmud selbst lest sich mit grosser Gotttslestes-
rung vernehmen: Auch der Rabinen vergebliche
Wort sind so wichtig/ als die h. Bibel. Item: Wer
in der Bibel liest/ der thut wol etwas: Aber wer im
Thalmud liest/ der kan nichts bessers thun/ darumb/
daß der Thalmud besser ist/ als die Bibel. Daher ha-
ben auch etliche Rabinen ihre Jünger für der Bibel gewarnt.
Wolt ihr selig werden/ so last ewer Kinder nicht viel
in der Bibel lesen: Sprach R. Elieser, auff seinem Todes-
bette. Eben das ist auch des Pappsts Meinung/ der wil seine De-
creta der Bibel gleich gehalten/ oder auch im Streit vorgezogen
wissen. Daher offenbahr/ daß es Ein Geist ist/ der die Papisten
vnd Thalmudisten treibe/ nemlich ein Bibelfeind/ oder ein Feind
Gottes vnd seines Worts.

Demnach/ weil vnser Elias mit der thalmudischen
Auslegung/ oder viel mehr Verkerung der h. Schrifte

nicht

nicht zu Frieden seyn können/ vnd darneben vernommen/
 daß die Christen verhofften durch einen gecreuzigten Jü-
 den/ welcher der verheissene Messias seyn solte/ selig zu
 werden/ welchs se ein wunderlich vnd seltsam Ding/ hat er
 sich zu den öffendlichen Versammlungen der Christen/ in
 ihren Kirchen/sunden/vnd mit Fleiß drauff gemerckte/ was
 des Christlichen Glaubens Grund were/ vnd wie derselbi-
 gen Kirchenlehrer die Schrift auslegten/ vnd sie auff ih-
 ren Christum deuteten/ aller Ding/ wie die Jüden zu
 Berrhoen auch theten/ da sie S. Paulum hörten von Jes-
 su / dem gecreuzigten / predigen: Sie namen daß
 Wort auff ganz williglich / vnd forschenten
 täglich in der Schrift/ ob sichs also hielte/ A-
 ctor. 17.

As nun vnser Elias hiedurch/ se lenger se mehr/ con-
 firmirt worden/ hat er/ den rechten Grund zu erfahren/
 vnd in allen Artickeln desto gewisser zu werden/ den kleinen
 Catechismum Lutheri vor sich genommen/ mit hebre-
 ischen Buchstaben vmbgeschrieben/ fleißig gelesen/ vnd
 gar außwendig gelernt / nachmals mit andern frommen
 Christen/ vnd geleerten Leuten/ sich drauß vnterredt/ vnd/
 durch Gottes Gnade/ so weit kommen/ daß er seine jüdis-
 schen Irthume/ vnd dargegen die Warheit Christlicher
 Religion/ gründlich erkant/ vnd bey sich gänzlich beschlos-
 sen/ vom Judenthum abzutreten/ vnd dem Christenthum
 sich zuzuwenden. Ist drauff diß sein höchst Anliegen vnd
 tägliche Sorg gewesen/ wie/ vnd wo er zur h. Christlichen
 Tauffe kommen möchte/ welches endlich/ auff sein emsigs
 anhalten/ vnd eingebrachte Commendation Schriften/

Taufspredigt über einen Jüden.

auch auff vorgehende vielfaltige Examination vnd Berhör/ von vnser Landesfürstlichen hohen Obrigkeit gnädiglich bewilligt/ daß es dieses Orts/ in vnser Kirchen geschehe/ wie denn ihund/ mit der Hülffe Gottes/ geschehen sol.

Auß dieser Erzehlung vernimpt ewer E. L. daß vnser Elias in den jüdischen Sabeln/ ja/ auch in jüdischer Feindschafft vnd Lestung wider vnsern lieben Herrn vnd Heiland Iesum Christum/ sein H. Wort vnd Evangelium, vnd wider die ganze Christenheit/ tieff gesteckt sey/ welches im nunmehr von Herzen leid ist/ vnd bittet Gott vnd Menschen vmb Verzeihung. Denn er hats/ wie S. Paulus/ vnwissend gethan im Unglauben/ vnd ist anders nicht geleitet vnd geführt worden. Damit er aber auß solcher Finsternuß gerettet/ vnd vom Unglauben zum Glauben an Christum bekehrt würde/ hat Gott mit ihm procedirt, aller Massen/ wie S. Petrus allhie in vnsern ihigen Lection berichtet/ nemlich/ daß er ihn zur h. Schrifft geführt/ da daß feste prophetische Wort/ in seinen Weissagungen von Christo vnd seiner Zukunfft/ ihm vorgeleuchtet/ vnd geschienen/ wie ein Licht in einem tunkeln Ort/ biß der Tag des h. Evangelii in seinem Herzen angebrochen/ vnd darauff der helle Morgenstern Iesus Christus/ mit vollem Schein seines seligmachenden Erkentnus/ in ihm auffgangen. Desß danckte er nun seinem vnd vnserm lieben frommen Gott/ Vater/ Sohn/ vnd H. Geist/ vnd ist hierauff gesinnet/ die H. TAUFBE/ als ein kräftig Seelenbad/ darinnen er/ durch die Krafft des WELS Iesu Christi/ von seinen Sünden abgewaschen/ vnd newgeborn werde/ desßgleichen als ein gewiß Kennzeichen warer Christen/ anzunemen/ mit einem neuen/ sich

Actor. 22.

Eph. 5.

Tit. 3.

Johan. 3.

Marc. 16.

Esa. 44.

Christo

Tauffpredigt vber einen Jüden.

Christo zuzuschreiben/ vnd bis an sein Ende/ durch Lieb vnd Leid/ durch Creuz vnd Tod/ bey ihm beständig zu verharren/ vnd die ewige Seligkeit/ in einem ungezweifselten Glauben/ von ihm zu bitten/ zu hoffen/ vnd zu gewarten.

Hiermit sey er euch in ewer andechtig Gebet/ Christliche Lieb vnd Gunst/ als ein newer angehender Christenmensch/ treulich befohlen/ vnd/ auff das der Allmächtig Gott/ sampt seinem lieben Sohn/ vnd h. Geiste/ diesem hohen Werck mit Gnaden beywone/ im/ vnd vns/ zur ewigen Seligkeit im Himmel/ mit allen Außerwelten/ verhelffe: so erhebt abermal ewre Herzen/ vnd spreche

im Glauben: Vater vnser/ der du bist im Himmel/ ꝛc.

Gott allein die Ehr/
Vnd sonst niemand mehr:

A M E N.



Gedruckt zu Erffurt/ bey Jo-
achim Wechler

Im Jahr/ M. D. C. L. iij.



402.

Pa 5265 QX

Za 5265 QX



NOVA

NOVA

NOVA

m.c.



h. 114.26

Melchior
 Von den Jüd
 lichen
Melch
 Auf de
 Der Arbeit
 nier Christen/
 vnd
Mi
 furt am Ma
 genant / gesch
 Pal
 fe **JOHA**
NI, eines

Za
 5265

874

uf
IA-

anch
LIAS
 / am

from
 ellet

gründ

